

雲
仙
集



雲仙集目錄卷之二十六

禮記雜議

禁遷葬嫁殤

久喪不葬服議

居喪不記閏

扶靈嫁娶

士大夫居喪宴飲

忌日宜避

吊服加麻

無大故不宜改葬



嫁母不宜合父葬

隨抱子必須歸宗

居官者須盡期功之服

姓氏同出

宗子法

出妻以義

異姓不可為後

官員失禮

禮為舊君有服

喪以尊卑為重輕

舅父不可奪孀婦寡女之志

奔喪不及殯

庶子不為長子三年

雲仙集卷之五十六

雲仙散人著

子胤杉進士李敏德

太學生崔豸

郡庠生趙邦憲

姚誼同校正

禮記雜議

禁遷葬嫁殤

周禮地官媒氏禁遷葬者與嫁殤者鄭玄曰遷葬生時非夫婦死則遷之相從殤十九以下未

嫁而死者生不以禮相接死而相合之是亦亂人倫者予謂古人既有明禁今世俗男女有殤者必相求合葬為鬼親甚亂倫而無禮雖士大夫家亦為之殊可慨焉古者葬殤於墓道左右謂血屬弗可離於親是亦人情於禮允合好禮君子當從以正不可苟從世俗

久喪不葬服議

喪服小記曰久不葬者唯主喪者不除其餘以麻終月數者除喪則已予謂主喪者必是嫡長子孫如父母之喪久不葬雖以主喪長子長孫

不除其餘次子庶子既有三年之制亦必衰練不可盡除庶盡子道其餘大小功總除之可也
居喪不記閏

閏月只是歲之餘以天時窺之三百六十五度無多月之理三年之喪實則二十五月餘月而禫謂其淡淡然平安之義今人有以閏月數祥者考之古人亦以閏月為言吁可恠也夫三年之喪天下之通喪期及大小功亦為伯叔父母昆弟之親何忍一月之服而爭較焉君子自當淡然不忍足其月焉可也

扶靈嫁娶

居喪嫁娶國有大禁在古人亦不敢為今世俗假以扶靈居然嫁娶豈有父母之柩方虞而花燭之事乃作人禮大變有司知而不舉鄉里以為當然傷風敗俗莫此為甚當國大宗伯弗為之言可乎

士大夫居喪宴飲

古人居喪使婢丸藥人以為罪五代之季居喪士夫無敢公然飲酒食肉者今士大夫讀聖賢書丁憂家居未葬而已復寢既葬公然宴飲往

來朋遊與世俗野人無異况望化導鄉里邪春秋責備賢者君子則必不為為之者則非君子也

忌日宜避

君子有終身之喪忌日之謂也家禮父母忌日則素練衣祭今士大夫遇父母之忌未之或講居官在外長子則無載主之儀支子亦不設位而祭遇之忌辰視事如常甚可悲也今閭閻小人遇父母忌亦設祭而哀况士大夫反不如邪君子讀禮不可苟焉如遇忌辰雖朝參公座辭

之可也

吊服加麻

羔裘玄冠不以吊蓋吊服必練衣布素今世吊服或白布衣涼衫帽子頭巾之類皆可但加麻者即今之孝帽巾子是也比於袒挽與總雖加麻無日除之數故曰吊服加麻朋友師弟子加之比隣遙親外宗皆宜暫加之是今之孝帽為合禮云

無大故不宜改葬

春秋穀梁傳魯莊公三年葬桓王傳曰改葬也

不言故者必有故也今人多以風水地利之說而改葬或因病疾貧富不利於身而改葬是無大故而改葬也禮有改葬服細是必有大故如山地崩烈大水蟻蚋為患道路兵馬所及必不得已焉而後改之豈有為利於身家而移動親之體鬼比於不孝不仁甚矣故君子苟無大故不宜輕改

嫁母不宜合父葬

婦人再醮已失其身是得罪於父以及祖宗而其子雖無絕之之道至於服亦減殺近世嫁母

有故子仍為父合葬此大謬矣且夫人既失節有辱其夫而子孫仍與父合葬是累其母之罪而辱其父也置之宜從嫁者庶幾有益於風教得稱為孝子

隨抱子必須歸宗

程子曰餓死事極小失節事極大今世婦人隨抱幼子再醮者只是怕寒餓死其子既長必須歸宗以存其祀其繼父亦須遣歸庶幾不絕嗣不亂人宗

居官者須盡期功之服

期年之服孫為祖父母姪為伯叔父兄弟大功小功則為曾祖父母從兄弟此天倫至情其服制載在明律例不可殺者今之居官例無丁期功之憂而聞期功之喪亦不可徒為哀哀長息視為途人當暫輟官務一月半月私為之哀素衣於宅眷然後心喪以盡期功之數庶幾不失親義而忠可移於政也

姓氏同出

魯娶吳孟子人以為不知禮而孔子甘受其譏至於吳魯同出一姬宋杞自為一系分源異派

蓋不止此賜姓分氏自己迷之易地避名固已
遠世不知者尚無得罪而知之者皆深不考庶
民之家猶或難言士夫之族號守經達禮亦謾
不留意婚媾相結累世因仍其亦可鄙讀禮君
子自當博考以避之庶幾不愧

宗子法

古者宗子有法百世以收族人近代已無任情
分戶其則變易姓氏雖通婚姻亦不可知深可
慨焉且宗子法壞蓋有二焉一為其極貧失業
不能收族事先一為其愚頑無知流落以迷其

代一為無嗣絕世遂至不祭有一於斯而族人
各自散亂終無以成宗法也三者難保必無而
宗法不得不壞也今欲粗為宗法祭田祠堂支
子助祭之禮必須先講嫡支愚頑須立贊助者
使共挾持之以待賢生流落者次支許權宜行
無後者許次者繼立先同父次同祖次同曾次
同高得以直接其派庶幾宗子之法可行矣

出妻以義

古人出妻俱以義當出也所以有七出之理今
人以出妻為鄙事妻有淫妬及不孝之大罪而

為夫者皆隱忍而為無如之何亦有公姑以氣
盡不得死焉者或至為自絕其嗣者夫被羞媿
不敢當出妻之名總有剛勇男子不過撲打呵
禁而已其婦至死不悔其柔弱男子終身被其
困辱吁可恠也已夫男女以義合不合則去之
亦禮之常兄弟天倫有一小隙互相搆訟睨牆
視為路人惟妻則不敢焉是不知大義者也苟
人不幸遭大妬大不孝及淫奔之妻亦當以義
出之可以化鄉邦可以全人倫其為美多矣昔
人有以蒸梨不熟出妻者豈為梨哉必有故矣

孔子大聖孟魯大賢亦出妻聖賢豈得已哉

異姓不可為後

無後者古以同宗為之同制支子為人後又曰
支子後大宗也嫡子不得後大宗也又曰小宗
可絕大宗不可絕此特論其大宗云耳今人家
不可論大小宗無子者多以異姓為之或自乳
抱養之或三五歲養之為之已子恥以同姓同
宗之人為也殊不知他人之子血屬氣脈已不
相通明為有子實則暗已絕嗣矣律有明禁而
俗仍為之甚可恠焉人有不幸而無子如大宗

自可以次支小宗繼續小宗自當擇同宗行輩
之人為之庶氣脈相通血屬不斷而可以繼世
幸毋從俗及聽婦言而以異姓為自以絕世

官員失禮

國家典禮自祖宗朝已定卑官見上官各有
禮今則惟屬官頗詳至於武官雖公侯伯而下
官全不以禮止是長揖各官於宗室及使者亦
有謾然不知禮者典禮之壞自文官始致爭
辯不已禮樂征伐自天子出非天子不議禮
祖宗所制布在方冊各官不能考求惟欲傲物

自矜吁孔子問禮又曰不學禮無以立禮不行
已何在其為政失禮之咎又將誰諉

禮為舊君有服

禮為舊君有服今各藩長史已下諸官遷轉他
府聞舊王薨全無服制是可忍哉有識者須少
為之服庶合禮經以盡忠誠所以望事大君者
喪以尊卑為重輕

禮曾子問曰並有喪如之何何先何後孔子曰
葬先輕而後重其奠也先重而後輕禮也今人
家有父與子同亡者其葬必先子而後父其奠

必先父而後子如祖與父同亡其葬也必先父而後祖其奠也必先祖而後父蓋以尊卑為重輕不以服制為重輕也如以服為重輕必是子先父食

舅父不可奪孀婦寡女之志

婦人再醮乃失身失節最醜行也程子曰公是後世怕寒餓死然餓死事極小失節事極大今人有孀婦未守三年之制舅姑奪其志而嫁之亦有親父母奪已嫁寡女之志而嫁之者使彼子壻含恨九原婦女不忍於生世緣習已久人

為當然風俗之壞有至於此遂有夫肉未寒鄙人已議婚者吁皆緣無知舅姑不才父母為此禽獸之行且鴈禽耳一失其雄終不再偶可以人而不如鳥乎官不為之禁里有賢人君子宜身先勸道庶幾漸革夷風以厚人倫以裨王化
奔喪不及殯

禮奔喪不及殯先之墓括髮袒哭成踊自父母及齊衰以下皆有儀今有仕於外者奔父母喪不及殯不先之墓而哭於家不成踊不括髮居久因節令而一之墓齊衰以下蓋有數年不之

墓者嗚呼禮之壞亦至於斯邪好禮君子緣情
尊經必先之墓

庶子不為長子三年

禮庶子不祭明其宗也庶子不得為長子三年
不繼祖也蓋大宗繼祖之長子其父則三年庶
子之長不繼祖則無三年之服也宋儒亦不加
考蓋均以父為長子三年著在家禮五服圖至
我

朝始正期年之服

雲仙集卷之二十六

雲仙集卷之二十七目錄

碑文

崇脩武安王廟碑

祭文

祭沁源八四哥文

祭潘懷王文

祭亞中大夫儀賓宿愛竹文

祭清源王妃郭氏文

明故夫人崔氏壙志銘

原

原命

通鑑斷說

董子武帝

項籍

始皇

漢高

左氏族譜叙

雲仙集卷之二十七

雲仙散人著

碑文

崇脩武安王廟碑

忠勇而邁當時精爽而昭後世是乃高古之
義闕盛衰之理生則國賴之以昌逝則人以爲
神此蘇子所謂有不依形而立不恃生而存不
隨死而亡者蓋嘗論之天人之理惟誠可以貫
金石惟義可以蹈水火其氣浩然塞乎兩間亘
古今而不沉在天爲之星在地爲之靈在人爲

之英幽而為神不屈而長鑑此理之昭昭莫可
誣也自漢室傾危三分鼎峙當時豪傑惟

關王雲長凜然忠勇人不敢犯雖曹瞞之奸雄
察知王義亦不敢留是必有以動其天而奪
其衷然後可以從容辭歸也不然操以奸雄網
羅豪俊至於禰衡楊脩以口舌雞肋之微亦不
能存誰云蓋世之英寧能輕而舍置哉於此益
見王之正氣有以奪其天而動其衷也既委
質先主忠義不回又豈有一毫富貴威武介於
心而少屈耶吁非有聖賢之操能是乎後王

獨守荆襄威震華夏人咸知王之忠義

心在帝胄而無敵於天下使天果祚漢孫氏效
盟曹魏殞敗孔明南方已定之後張黃諸將無
恙同出祁山直指中原其定天下猶反掌耳嗚
呼可惜哉王之英武不信浩然之氣常在塞
於天地之間上與日月爭光山嶽並峙無少損
也粵惟漢迄我

皇明蓋千餘年晉唐宋元亦數十代而王之
祠廟遍天下至窮鄉下邑商旅之徒亦奉王之
之像知所崇慕其老釋之教猶以王為監法

以此親之 王之神蓋充塞宇宙流通上下悠久而無疆焉者澍安有 王之廟在遵教坊北相傳天曆間始建迨我

皇朝累加脩葺凡水旱疾疫無不禱祈其靈響神應不可殫述民賴以安 國家亦載在祀典今年殿宇有傾壞者香老范鑑等率坊民加脩之請碑以傳來義不可辭謹述其槩鐫之堅珉其營繕月日王公信士之施與別爲立石題名

云

祭文

祭沁源八四哥文

嗟哉四哥惟我 皇族厥初一源同敦共睦四哥之生與我同庚長我五月有隨並行我學詩禮兄亦文章共期成德久而弗亡今茲六月兄忽不祿脩短在天誰能斯必我哀我悲兄何知之真此一觴九原之思

祭潘懷王文

代姪胤棕作

惟王之逝可悲可哀今不見王又隔歲時嗟嗟吾王悠悠何之生享大國歿亦哀思宗人之痛國母涕洟茲當窀穸祖真是期我觴於王王實

有知

祭亞中大夫儀賓宿愛竹文

惟靈忠孝世家作賓王室篤志清純惟誠惟一
讀書明道於理是適有子高第克誠奕業宜享
期熙胡遽云卒一邦善士令人嗟及奠于一觴
永歸窀穸

祭清源王妃郭氏文

惟靈出自名家選配宗室顯受妃封榮貴已極
相夫助奠貞淑誠一正宜安享胡遽長終訃告
式臨不勝哀悼茲特吊祭惟靈鑒知

志銘

明故夫人崔氏壙志銘

夫人姓崔氏澹安右族厥世有隱德父相母王
氏生而惠精女紅將髻選配 潘府輔國將軍
胤棕嘉靖十四年乙未正月二十八日 誥封
夫人侍姑孝順及善事君子姑嚴夫人是從無
事不出卧內輔國亦以禮待之於是人稱其賢
嘉靖十八年後七月一日以疾卒享年二十四
歲距其生正德十一年丙子十月十有四日也
無子生女一人尚幼卒之日親賓無不哀傷之

奏聞 朝廷賜祭一壇遣內官祭之 命有司
造壙如 制以是年某月某日塋諸宋庄之原
從先兆禮也嗚呼夫人以貞淑之姿作配宗室
榮有封命早殞弗壽亦可哀也 銘曰 婦以
順兮乃為良貞一其德家道昌事君子兮為之
綱壽不求延庸何傷墓此吉兮百世祥

原

原命

可為者責之於己莫可為者歸之於天天與已
豈二乎云哉蓋天之所以與我者有定吾之所

以應天者無涯以無涯而責己以有定而歸天
豈不聰於理與道也耶夫天即理也理之所在
即天之所在天豈外於是理哉蓋吾心之理乃
天所賦之理即天之所以與我而令我者吾敢
不修而以事之乎天之與我者何哉善而已矣
苟不善是應是名謾天謾天者是不知天也不
知天而求合於理與道未之有也天之所以命
我者性分之所固有天之定我者身外不可苟
求性分之所固有者仁與義焉智與信焉其理
甚明其用甚夥敬而守之未或不有天之定我

者富貴省賤夭壽榮辱其來莫禦脩身以俟未
或不安若棄其所固有而惡其所莫禦是名違
天天可違乎夫富貴貧賤夭壽榮辱莫之爲而
爲之天豈有心乎子夏曰死生由命富貴在天
天即命也其在其由我何與焉是以君子知其
在我者當如此在天者當如彼脩其在我聽其
在天不亦綽綽乎有餘哉弗脩其我之所當在
而強其天之所由定未見其爲君子故曰不知
命無以爲君子作原命

通鑑斷說

董子武帝

人主以好強喜大爲志未不自多欲始內既
多欲而好強喜大之志無時滿塞雖勉爲仁義
不可得也何也好強喜大之心已爲多欲累困
豈真能強大也哉易曰君子自強不息孔子曰
惟天惟大惟堯則之漢武好強喜大正坐不識
自強不息與則天之大耳當是時有一董仲舒
以賢良得對陳天發道諄諄慷慨至數千言無
一不切中時弊而武帝聽而不用吁可惜哉亡
仲舒則貪祿求寵自售如東方曼倩輩豈少哉

吾知天人相與之際正誼明道之說至今耿耿
豈尋常功利之徒擬哉有此英儒帝不能用幸
老江都侏儒方士之徒徃徃寵厚終身豈非倒
施而逆用耶武帝不足責汲黯之徒徒以多欲
激之使海內虛耗太子兵死幾為忘秦之續可
勝嘆哉嗚呼仲舒之不偶豈仲舒之屈耶蓋武
帝之不幸耳後之人主有好強喜大踈斥賢者
亦可以鑒矣

項籍

項羽以蓋世之豪拔山之力以滅強秦割地而

封諸侯諸侯莫敢不聽然而以力不以仁一敗
途地遂至身亡家喪無他自用自是而已嗚呼
使羽能兢兢憂畏任天下之賢而用其謀抑其
氣平其心不敢自是自用則漢之不為漢未可
知也以其棄天下之賢遂之漢有雖欲不亡烏
可得也而曰天亡我愚哉

始皇

始皇奮大雄威用商鞅法刑治天下平居而滅
人族肉人體不可勝紀以殊死為輕典殺伐為
恒事公族有罪亦戮太子有罪黥師偶語俠書

者棄市郡縣天下疑同姓而弗用疏子孫而不封擯斥賢者不仁不義天下苦之猶逞威遠行防胡高築款爲子孫萬世計而自求不死之藥嗟夫愚哉鮑魚臭腐董豎佞權矯殺太子天下凌遲嗚呼自秦死太后人倫已絕誅鋤厥宗本支彫敕焚書坑儒破壞井田不二世而亡天道好還亦曰宜矣

漢高

漢高知人善任拔韓信於逋逃拜以上將見英布於羈旅與王者之供前疇方借則悔罵躡足

一舉則大封資陳平以金不問割三傑以地不惜委敬之言即遷長安叔孫之舉即定禮制沙中偶語之說納之商山輔翼之老重之賞功無吝用諫若流雄才大畧非後世人主所能及光武有取天下之慮不如高祖之才劉備有取天下之量不如高祖之善將將若項羽匹夫之雄而自用以婦人之仁吝畷猜忌可能此並哉

左氏家譜叙

左氏出自炎帝苗裔其先嘗爲四嶽佐禹平水土有功虞夏之際封於呂又封於申夏商時申

呂封其支庶於姜從姓姜氏十餘世至東海呂尚輔周西伯克紂有功封於齊營丘號曰齊太公太公百有餘年丁公呂暨立六世至共和周宣王初立齊有左公子者居於濟陽右公子居於河內各以爲姓而左氏得姓蓋始於此齊由共和至簡公又數世田常亂以及康公二年田和始列爲諸侯遷康公於海濱姜氏不祀獨左氏之族散於齊魯冀冀間若丘明者爲古之聞人左氏爲春秋傳魯左人郢爲孔子弟子在戰國冀稱左伯桃漢有左雄安帝召爲冀州刺史

按二千石無所回忌時稱其賢晉魏間左思太冲爲三都賦居齊臨淄唐左瞻居扶風隱崇嶽不仕德宗召亦不起蓋齊魯之左祖人郢太冲冀冀之左祖伯桃與雄扶風之左祖瞻宋南渡齊魯冀冀之人多從而之江而江右之左於斯爲衍代遠族湮莫之可世而居吉安永新者爲今左氏之先焉名邦正字某生元季我

太祖龍飛首登洪武科舉人授南京應天府教諭一子添麟遷潘陽群牧所伍陞摠旗永樂戊子隨我簡祖分封至滌而居焉二子添驥添

麒麟別爲之傳。若之左族自茲始。盛暨今五葉。世受國恩。玄孫于堂。勤勞藩邸。蒙奏授儀衛典仗。職精敏。特達有爲。慮厥家乘。失傳譜系。闕畧。自以厥先。若高曾已下。彷彿其世次事實。作記。懶請爲叙。及譜。欲俾伊子孫傳遠。毋忘其先於戲。盛哉左子之舉。余竊嘗謂世道斬下風。倍頽靡。氏忘其先族。失其傳。父矣。蓋宗子之法。壞而譜不作。世家闕而氏不收。流寓漂泊。蓋弗知其幾。往往爲東西南北人。雲仍踈隔。豈能念其鼻先哉。閭閻細氓。窮乏無能。爲既不可辯其

屬籍。登仕版。榮顯於世者。亦弗以氏族慮。任失其裔。姻婭莫爲。恐怍袒裨。不爲哀戚。乃有覽梓封壟。弗識其爲先人土者。吁。氏族至斯可悲也。已昔蘇氏老泉慮此。作族譜。蓋小宗法也。小宗法。續高曾而繼禰。以及其始。別子爲祖。繼別爲宗。尊祖而敬宗。宗各有傳。傳各有系。人得而爲之。自達於其先勢。至不可忘。而世可次也。今夫左氏之族。幸未遠。而世次之分。尚有傳。小宗之法。宜作也。譜而系之。由一世以至數世。喜有慶爰有吊。雖親盡服衰。猶爲總。爲袒裨。弗至爲塗。

人可以厚人倫長孝敬移風倍崇禮教以達於
王化謂弗重歟左子斯舉可謂盛矣然則由今
而往左氏子孫苟能守若譜睦族敦宗孝親弟
長脩齊而身家毋忘厥先斯譜豈數世已哉將
無窮焉爾今觀左氏子有選雋郡庠進德脩業
可望是知左氏之世未艾也余衰病不能文姑
重左子之請書其槩爲叙若夫其先之隱德至
行備於譜年此毋贅焉

雲仙集卷之二十七

雲仙集卷之二十八目錄

雲窩新稿

感興八首

夏日寫懷

上雲樂

宛轉歌二首

白紵舞歌三首

妾薄命二首

美女篇

升天行

遠遊篇

鬪雞篇

走狗行

陌上桑

芳樹一首

將進酒

劉生

習習行

九日登高北望

夢中作

國主南山惠菊八盆作此感謝

樂壽亭歌二章為宗約雲岫弟作

又題樂壽亭

春晴用子杉韻

春夕小酌用子杉韻

栽楊

雪山

聞鳩枕上作

春晴分韻得刪字

閒

哀時人辭

登塔子嶺

對鏡

偶述

題池中白鴨

庶子生有作余年五十三

不寐

鮮嘲

咏雪

坐

太行危

流水

宋生行

雲仙集卷之二十八

雲窩新稿

雲仙散人著

子胤杉進士李敏德校

感興八首

朱樓聯紫薨一與白雲齊綺窓疎宵窅繡戶間
金扉上有雙紅鴛下多碧錦雞錦雞好羽翼鴛
鴦時並飛灼灼西園花花開正春時當春自湛
樂好鳥各分飛

太山陵紫霄而上無垢氛朱暘正皜皜照我室

雲仙集卷之二十八

四

中人南國何憂思未莫日忽沉悲風起蘋草淒
淒吹比隣我思古人言朋友宜盍簪四海且如
此而况同袍親

束帶檢容儀儼粧耀閭里置酒空堂上斟酌爲
誰起我昔遠行道徘徊涉伊水伊水流且深褰
裳濡我首今我安室家羈懷愁獨守言念東山
詩但復醉醇酒

錦樹生江頭秋楓兵爲華一朝化羽人錦樹雨
中嗟瀟瀟東南湘淚竹娥皇家皇英空自啼日
夕無所歸駕言遊碧落願爾瞻餘暉

夏日苦炎劇驅車廣道傍出門何草草歸宿定
何方丹鳳落棘枝故非栖止塲顧眄苦竹根飛
去心長傷雲從海上來化作白衣裳終風吹雲
去不爲膏澤降嘆息風雲變日暮徒徬徨

寒江有孤舟結纜水之湄風帆鮮客棹日夕浪
漪漪蘭花生澗底空芳誰與知我有蜀錦端上
繡金鳳絲行將投贈君憶君終棄遺流水日已
深對君日已稀嗟哉參與商奚事東與西

天馬黃金絡韝之白玉鞍視日千里行晨駕孰
與駢長嘶飽石粟毋用珊瑚鞭主君好凡群惜

哉棧豆存周行不能去羊腸日欲行促織叫秋
霖黃鳥鳴春風四時各有媚老鶴空青松
裊裊百丈松長在泰山阿根盤潔白苓條附青
青蘿直幹雖亭邁枝葉恐彫踈良人在他方頻
年音不至空有長相思君寧不相憶天邊鴻雁
聲叫我南樓曙愁緒亂如麻正憐雁行隊雁過
有遺音人生苦憔悴

夏日寫懷

無用媿瑚璉不材慚樗木簡畧衆所捐栖遲惟
自足侵晨履恒素向夕焚膏讀登樓發長嘯爰

山迹遙矚 盛世汰糠粃宗人慚高祿紛拏慵
逐隨寡約要守束態度孰妍媸文華願甄錄
仰但幽軒逍遙任輕轂謝塵憇深巷厭事慕河
曲東風入牖青夏草增苔綠濛濛雜花塢飄飄
白雲谷邂逅豈心相寂寞鮮膏沐黜陟寧見聞
恭默乃所欲抑志甘隱淪索居恥華屋曠蕩
聖恩餘感激終齒沒

上雲樂有叙

上雲樂者梁武帝所作以代西曲其
曲有七皆言西方聖人獻祝中原天

予之意而朝會大享皆獻舞為技隋書樂志有老胡文康周捨作其辭委曲唐李白亦為之曲終有曰天子九八八十一萬歲長頤萬歲杯其聲容舞態今樂藉中鮮矣近偶見梁園倡胡舞而歌康老者因憶古意尚存而正音失傳因效白作上雲樂

流沙之西烟霧霏霏天生老胡名文康身毛骨梗顴白眉黃髯尺髮丈夫熊足箕極為恠禡貌况復絕異姿吞吐日月精卧濯咸池滋南遊弄

岸渡東折扶桑枝高蹈崑崙上投玉帝壺此老父元氣乃更母神機世人那覩是胡為躡躡織就雲龍胥迤迤過北海宓羲見而以禮之女媧煉石火胡老吹當時不周山初頽老胡立扶半壁危堯聞康名欬推讓笑而不語心為非弗知壽千百但見碧眼光琉璃獅子犀象作猶犬鳳凰鸞鷲為家雞大道遠行七聖迷文康指點得路岐有時入火焚不灰有時入水不濕衣中天象緯始安定手分列宿開東西參商起落變朝暮坐令烏兔相因依軒轅來龍謁大帝胡能弼

相長揖而誰知胡康聞至道以此小事書與詩
邇來明廷朝紫闈北望稽首端無爲感聖德服
聖威胡歌敬禮呈仙技萬舞鳳鳴曲雜奏瑞麟
辭靈藥奉至尊玉芝進彤墀俯伏百千拜頃足
穎至頤仰企 龍顏惟跪獻天花枝北斗弗可
量南山終無摧 陛下億萬歲應與天無期四
海蒼生樂共上長生杯

宛轉歌二首

秋軒清月冷冷疎風細影梧桐夕斗酒金徽共
此情歌宛轉宛轉心悠悠願爲東逝水千秋不

斷流

聲悽悽意遲遲哀絃苦調動商羽紅淚闌干悲
復悲歌宛轉宛轉思欲長願爲琴上索終得弄
君傍

白紵舞歌三首

金馬明璫繡紵衣紫縹紋縠帶裙施翠荷鬢掩
玉鳳挑回身定目意有餘手垂袖躡輕雲飛飄
巾綺席玩者痴從僕愁侍苗食駒纓絕燭昏客
慵歸

蘭宮椒壁閣綺窻芸芝窠窈瑁梁方花玖璣

排柱盈流蘇簾珠翡翠幘玉笙鸞簫列座隅趙
瑟秦箏聲舒徐風淒音轉意態回含眄寓寄鳴
鳳辭

高殿桃風凝春芳擊石扣金舞羽裳蕩漾精態
流宮商飄飄紅袖輕舉揚猩唇送音歌何長秦
簫彩鳳和鳴翔含情睇影雙鴛鴦織織玉臂平
分張千金齊喜壽命長

妾薄命二首

麗質本清素淑性且溫純始笄事紡績女紅長
苦辛爰侍君子側禮態何貞真奕李春灑激笑

蓉生澄濱但恃芳香節那知朱光沉秋風動遐
颺花色失舊殷君心嬾採結妾意空自淪

羅衣淺淡色蛾眉減容粧長門十步地誰復拜
君王且下水精簾還窺月光偏照笙歌席不
燭離人腸

美女篇

瑛趙產佳麗况復多怨歌艷色不自許玉態寧
復過丹臉溫霞彩粉香簇翠娥蟬髮籠鬢髮靚
衫緜薄羅織手弄錦瑟櫻唇吐嬌聲五陵公子
羨長卿士迎絕有清雅姿未爲春閨情

升天行

上帝錫靈藥已換骨與軀肝膽整洗滌眉目離
凡愚居塵那復染在俗真難污輕舉亦自然翔
鳶來天衢紅雲遶足下冷空從遨娛進謁玉皇
關授以金秘書神仙共酒樂沃醉瑤池姝俯顧
五嶽巔三兩微烟墟

遠遊篇

長景御風輪攬轡逐羲和八紘遂遊遨四海隨
洪波蓬萊仙人居時時乃經過金母與飲宴王
公偕嘯歌朗吟玉芝曲笑摘璠瑰花沉瀝飽從

僕祥雲擁高車朝陵碧霄霧莫披紫崑霞天地
本吾宅一隅非我家衆人固嗤嗤奔營可奈何
桑田亦有變豈如行無涯逍遙自容與千乘奚
足多

鬪雞篇

二雄不相下一意併殊死鼓翼憤兇志側目躍
銳趾鮮血滴剛爪輕毛落利嘴踢踏恨未休搥
啄勢寧止神蕩噴畧醒心馳救難已所競亦甚
微重傷更何亟遊俠少年場戲生正如此

走狗行

蜡月寒威盈野雪凝空烟霏没林麓茸裘公子
調蒼鷹高驟快犬凌晨出厓前狡兔何輕狂月
霜覓食沿三穴鷹掣犬嚎疾若飛兔窮伏塊寧
迹匿淋漓鮮血胸臆剖魂斷身高草根赤君庖
不盈喜未足鷹饑犬餓仍牽縛急驅再逐山頭
鹿

陌上桑

秦氏有好女自名爲羅敷冉冉紅粧貌潔潔霜
雪膚十二莖蕊花十五玉不如二十嫁專城凜
然雄丈夫羅敷事蚕作採桑城南隅金筐携素

手高揭薄羅襦青絲爲羣裳盈盈嬌路衢騎者見
羅敷停鞭空嗟吁行者見羅敷思是誰家姝耕
鋤路傍子閒坐看羅敷不知傾國色但爲心所
無使君遠遠過從者一何都邂逅好顏色流盼
蕩情軀遣吏往顧問願言與同車羅敷謝使君
使君無自愚人生各有匹苟遇非妻夫鴛鴦雙
並飛志死同池渠此翼亦共樂雌雄常相呼人
豈不若禽相逢何爲娛使君自有婦羅敷自有
夫

芳樹一首

艷艷芳樹枝濯濯青樓女韶華二三月蕩漾春
風裏素手理芳枝嬌艷明花色兩兩雙鴛鴦交
首卧砂磧芳華迎霜辭故枝玉顏彫謝非昔時
鴛鴦飛散歲華莫零落容光空爾思

將進酒

佳曲舞垂手纖指弄秦聲錦瑟理越調明璫見
深情玉盤盛海玕金尊注黃流跪奉主人壽主
人壽千秋浮雲聚復散喜樂忽以憂願看妾容
華勿惟吟白頭

劉生

義氣千金重壯志凌青空寶刀粧玉環駿馬萬
里行戮讐死報主復怨事平生

習習行

春風習習良宵融光淑景逍遙芳樹亭亭柔條
鳴鴉上輔林抄白日條沉山坳醺酒南國清池
高臺宵窈竒姿山霏坐臨流漸風雲聚會幾時
歲月奔騰何之長劍有時倚天英雄槩氣當然
委巷俠客少年結交心膽相怡便應繾綣長驩
挾策好上明光心宵吐露君王薄伐斬盡戎羗
歸來不用金章覓與丹砂赤壤收拾囊橐載行

海邊樂伴喬松食霞服木餌苓浮遊雙鳳飛旌
千二百歲保形

九日登高北望

九日登高動高興黃花白酒恣秋香笑着世上
無窮事漫醉尊前有限觴落帽正冠皆謔浪臨
臺戲馬揔忘羊願瞻北闕青雲際遙獻仙菜
弄錦囊

夢中作

獨嶺峇峴接翠微明霞綵綵采雲飛對看野鷺
來前浦何似先生得忘機

國主南山惠菊八盆作此感謝

九日蕭條亦自愁寒花未放客驚秋忽逢
睿賜開顏色正想高情昔款留籬落那知仙苑
盛山園空對野晶幽便湏酌酒舒閑興爛熳無
人與勸酬

樂壽亭歌二章為宗約雲岫弟作

高亭逍遙兮樂壽且康樂壽樂天兮不知其名
吾心悅豫兮萬物同榮無憂無虞兮順天之昌
二

樂壽兮時雍嘒時雍兮仰皇風皇風蕩蕩兮

無西與東四海熙熙兮咸躋壽域中

又題樂壽亭

樂壽亭高臨太行太行幽處日猶長主人無事
惟靜坐客子時來亦不妨養鶴種松增歲度驅
童曬藥任流光忻然已有喬松味况爾飄飄與
世忘

春晴用子杉韻

膏雨朝歇東風媚新柳條柔春光鮮行看花塢
即時好忽聞鳥鳴清景前任移座間紫竹榻漫
憐簷外青絲縣可堪山色來栽屋悠然一笑樂

華年

春夕小酌用子杉韻

皎皎清月滿中庭月光淡淡還泠泠且醉尊前
一杯酒由來世上幾人醒此時豪放不可減他
年志節寧能增欲借雙鳧便飛去鵲橋爲駕任
高昇

栽楊

削得楊枝挿水濱水清枝綠正時新他年送客
由斯去將贈河橋遠別人

雪山

山雪連天曙青嵐淨盡銷方著林慮近始覺太行遙只尺迷銀海依稀見廣霄孤雲千里外愁對正無聊

聞鳩枕上作

雨鳩喚雨東風裡侵曉雲陰泥殺人方厭浮陰連白晝思邀曠日照青春湘簾莫捲高朱戶暖帳堪垂夢紫宸老去閑居更何事惺惺高枕任吾真

春晴分韵得刪字

輕陰散遙浦麗景明塵寰孤情憶耕讀高思臨

幽閑新暘恣背曝雅樂尋詩刪久無風物譁時爾長開顏

閒

花外桔槔聲靜聽草茵躑躅長閒看輕衫緩帶舒終日獨對青青墻缺山

哀時人辭

時人未識王孫貴王孫居高匪下位高皇子孫盡龍種氣豪肯與凡流配當其宮中幼育時所聞所見真書詩居移氣養亦已至忠信孝弟緣相師仁心自是偏愛物義象從來莫

不足豈似尋常閭里兒父兄較辯爭毫忽市井
喧囂日營利幾人發跡超群輩書生閉門惟學
文豈暇誠將父兄事縱有賢良已後期效尤傲
墮咸如之聲名一但陟科甲驕矜不肯將人下敬
事焉寧信禮本忍情獨爾沽高價此心只欲傲
王孫一遇達官即避軒伏道應甘炙手熱立階
仍畏翻爲雲王孫自貴亦有禮媿爾趨炎附勢
人

登塔子嶺

朝登塔嶺路嵯峨終日躋攀撫薛蘿到此山巔

宜小魯不知秦嶽更如何

對鏡

朝來把鏡拂塵面恰見新白生頭顱骨格已定
不可改豈有顏色隨榮枯

偶述

衰顏資金丹也蒙覓文武茫默獲刀圭激烈入
金銓燭蕩僅可持縮疾寧久有莫知天造設或
訝鬼阿守末看靈葉淨無爲若槁柳

頭池中白鴨

青荇開新塘白鴨浴鮮羽閑思若睢鳩偶行如

默語

庶子生有作余年五十三

雲夢蘭房靈株協瑤室日華耀朱庭春風熏
枿壁仰閱星采輝喜占靈鵲集晚歲獲嘉祥老
景增顏色敢擬寧馨物但事豚犬畢想其十五
齡吾年六十七願附汝兄股定不為父力世事
尚難料汝成吾豈及

不寐

不寐虛情思天涯夢寂寥冥心迎座漏欵耳聽
樓樵春透寒稠暖宵空曉月昭亦知少封事

憶紫宸朝

解嘲

愈媿干時幸雄羞解客嘲寧堪閑擊磬未敢絕
來交悶極思瑚璉愁餘弄斗筭空言本無補還
任衆聒聒

咏雲

舒卷恒多態飄飄未有心夜來空聚散此日竟
浮沉出岫無根蒂歸溪散好陰帝鄉更何處
乘彼欲求津

坐

榻懸庭柯幽眸合肘股案放易爐烟沉整日雲
影盱苔塔履跡鮮竹徑風色漫坐極室虛白靜
又事詳散聿觀心根平故與世塵判

太行危

於戲太行山突兀參穹宇恠石峻嶒兮巨萬里
東瞰秦嶽西俯華峙烟雲儻忽聚復昧清猿苦
彌愁絕峪其高如此上磨橫空之星采臺列在
下之分野峯巒轟轟插蒼昊日月走麓長於趾
以手捉軫斗震方明未開紈足少蹶萬仞溪壑
自實埋豺狼作群堆出入虎蛇利牙血麋鹿使

人鬼彫膽破股戰慄野鷗避天掠生食熊豹霧
變時人立遊客到此時足跋肱戰肩拍息齒扣
舌卷語不得噫吁兮禹湮澤水先空崖寡人跡
舜耕歷山後人與獸爭隙孰智不及人龍蛇罕
象寧走陸獨陵太行山高巖幽邃來百物樵者
曳斧上梯腦獵戶持戈昏出沒不憂墜巔坪豈
慮飽五腹但知競利蹈絕谷天暝雲兮生岫窟
紛毒嵐兮障傷目懸蚰蜒之細路曲虺蝎之草
木足烈手聳攀躋何極嗟衆人兮若洎洎僧髡
飡菌而咽其饑道士劖勾吻而憶仙籟鹿呦呦

今乳子鶴飛飛兮啄粒鼯鼠亦往往而上樹兮
渴蛟乃時時而尋竇山鬼柳榆於其方兮山靈
神恠於禍福人微兮登之若蟻來斯兮辛苦奚
慕况禽獸之紛雜又草木之叢族竊嘆夫平居
之子未歷長途好險趨阻越此羊腸摧騎覆車
無悔其行履危弗戒陟巔弗憂苟夷然而競往
終顛躓而殞尤

流水

源從坤厚發流逐太和清風送文波去悠悠無
限情

宋生行

宋生清時彥早遊太學中謁帝奉天上奇策
慷慨詞藻人稱雄吏曹試歷諸省闈京都旋食
閑春風嘗同郎官吟粉署更照驄馬巡秦叢西
來艷潏萬餘里天南獨往隨鳴鳴峽中好山水
飽玩滿心窩錦官白帝城遊覽興何多况有不
羈磊落才長咏巫峯雲雨歌巫山六六陽臺下
曾見朝莫飛巫娥襄王樓閣已陳迹今人嘆賞
空嗟蛇不畏蜀道難但悲豺狼蛇虎人前過不
怕瞿唐險但嗟衆水生洪波白馬江深已飛渡

鳥道叢林經行處歸來顏色未曾改惟覺人事
更非故世情冷煖豈我輩尋常直養浩然氣待
擢英華不讓渠致君事業還加意近來結交重
知己肝膽頃洞無塵滓數着圍碁一局心十年
道誼二三士如今海內尚名流選部先將姓字
收料想統才非百里政堪千石潁川侯

雲仙集二十八卷

